



UKA 2018/164  
25. oktober 2018  
Aqqaluk Heilmann

**Naalackersuisut kingusinnerpaamik UKA2019-imut inatsisunik atuuttunik allanngortitsinissaq pillugu siunnersuummik saqqummiussinissaat, taamaaliornikkut eqqumiitsuliornermut aningaasaateqarfimmik pilersitsinikkut eqqumiitsuliornermut aningaasaliissutinik tamanik agguaassinermi attuumassuteqannginnissamik pilersitsinissaq periarfissinneqarsinnaanissaat ilanngullugu Inatsisartuni aalajangiiffigisassatut siunnersuut.**

(Inatsisartunut ilaasortaq Peter Olsen, Inuit Ataqatigiit)

Eqqumiitsuliorneq anersaamut, kinaassutsimullu peqqinnartuusooq nukittuallatsitsisusoorlu ilisimavarput. Tamattalu kulturimut siuarsarusussuseqarluta oqariartortarluta. Oqartarpuguttaaq inuiaqatigiinni inuussutissarsiutit siammasinnerusumik annertusaaffigerusullutigit, nutaanillu pilersitsinissamik aqutissiuniarluta.

Piffissanngorpoq eqqumiitsuliorneq aamma inuussutissarsiutit isiginiarneqalernissaanik. Piffissanngorporlu eqqumiitsuliorneq avammut niuerutissatut, avataanullu nunatta nittarsarneranut atorlualissallutigut.

Eqqumiitsuliornermut eqeersimaartuupput namminneerlutillu ingerlarsorusullutik pilersitsiortuupput. Nunatta karsianiit tapiissutigineqartartut iluaqutaasarput. Ilisimasariaqarparpulli pisortaniit eqqumiitsuliornermut aningaasaliissutit inuiaqatigiinni kaaviiartitsereerlutik, sulisitsereerlutillu, nunatta karsianut pingasoriaatinngorlutik utertarnissaat ilimagineqarsinnaammata, nunani avannarlerni pissutsinut assingussuteqarsimassappat.

Eqqumiitsuliornermullu aningaasaateqarfimmik pilersitsigutta eqqumiitsuliornermut aningaasanik qinnuteqarsinnaanerat ataavannerusooq anguneqassaaq, politikikkut pissutsit apequtaatinnagit. Assersuutigineqarsinnaavormi ukioq manna qinersineq pillugu aningaasanik qinnuteqarsinnaaneq qaammaterpaaluit uninngagallartariaqalersimammata. Kiisalu attuumassuteqannginnerusumik aammalu pitsaasumik suliaqartoqarsimaneranik naliliisinnaassusilinnik qinnuteqaatit suliarineqartalissallutik.

Eqqumiitsuliornermut kattuffissuata EPI-p oqariartuutaa aamma naalaarparput kissaatigimmasuk eqqumiitsuliornermut aningaasaateqarfimmik pilersitsisoqarnissaanik oqariartuuteqarmata.

Pilersinneqarnissaanullu inatsisip allanngortittariaqarnerinik siunnersuut imalik Atassummiit taperserparput ataatsimiititaliamullu innersuullugu.